

# 1 PEDRO

## Pedro Saguho Kata Inweniby

*Xirâ kata wâgâ inwenily Pedro nhangahu odaji iemâmy Deus. Awylygue Deus itaumbrylâ xirâ Pedro inweniby. Jesus nhapygueni, aguely idani modo ewy myakâwândy Pedro.*

*Jesus einwânni modo tâsenagazedyllygue âkelo âjiram âwientyby modoram myakâwândy inwenily kuru, iomazeândoem. Deus itaumbry egatuly izepaom modoram myakâwândy âzenagazeolymo. Aituo xirâ kata inwenily myakâwândy xurutomoem, einwândyly nimopa itomoem, tyeinwândylygue tânagazedylly umelâ, Deus ize atolâ anhesezedomoem warâ. Cristo tânagazedylly nhemaen-hobyry ara, Tunwym ize ato aniempyry nipyralâ, arâ lâpylâ tâise akaemo nhemaenly, tyeinwândyly nimopamolâ.*

*Xirâ kata wâgâ einwânni modo tâduruhozemo myakâwândy, âpynedomoem, nâpeâmbyra itomoem, tâsenagazedylly nhemaen-homoem warâ.*

### Aguely adaguho

**1** <sup>1</sup>Urâ Pedro, tywâgâ aguenriem Jesus Cristo ingonotyby. Âmaemo Deus turâem iduakewâdyby modo wayam wayam ityby modoram xirâ kata kâinwenily, Ponto eynynonro modoram Galácia eynynonro modoram, Capadócia eynynonro modoram, Ásia eynynonro modoram, Bitínia eynynonro modoram warâ. <sup>2</sup>Iduakewâdyby modo âmaemo Deus aguehobyry ara, xurâem mitomoem. Deus Ispiriturylâ âduakewânimo, turâem âetomoem, Jesus Cristo einwânniem tywykenry ara mitomoem. Jesus Cristo tunu tyapâze kruz wâgâ, inakanhe amitomo-byry modo xygakehoem.

Alâ inanry âynynâmo Deusram kâenkadyly, imâem kehoem koendâ mâzehohomoem, âdylâ akaladânimo peba itoem warâ.

### Deus agâ kito kinwânwânto

<sup>3</sup>“Koendonro lelâlâ âmâ, tuomaenzeim warâ!” kykenre Deusram, Kywymâry Jesus Cristo nhunwynram. Toenzepa koendonro kurâem aniendâ, xurâem koendâpa kydawyly umelâ. Iweloem kyetondâ, kyazeondyly-ro waunlo ara. Iweâma kurâ tutuze, “Aiese urâ” tâkehobyry aiese awyly kurâem. Jesus igueypyem awyly ume kurâem tyetonze myakâwâm. Awylygue, tâinwânse lelâlâ kurâ, mâkâ aunloenlâ tagâ kyese awyly kyigueduo. <sup>4</sup>Deus tynynonro modoram “Xuduze urâ” kehobyry kienmakely kinwânwândyly. Âdaunloenlâ adainrim keba, inakanhe ini keba warâ ise kienmakely târâ kâjjidyâ. <sup>5</sup>Koendonro modo mâenmake-lymo nhontybyem târâ. Jesus tâinwânse mawylmogoue, nhetâmolâ Deus, eydâ atoram mydâlymo. Xypyry etay Deus

xutuen-honze, kienmakely tienkanâdyby âdaunloenlâ eagâpa kipyra kito.

<sup>6</sup>Awârâ wâgâ ohomaendaungâ, imakezemo mawânkâ Deus. Mârâgue lelâba wâne iwerâ mâsenagazedylimo, aekuru tâjityenzeba olâ itaungâ. Sakani kulâ awârâ mâsenagazedomo. Tâese wâne, takaze olâ; aunloenlâ nipyra. <sup>7</sup>Jesus tâinwânse kuru mawylimo eto awârâ mâsenagazedomo. Egâ wâneam ouru. Peto onwanji âieholo mârâ âjiguetolâ kuru awyly xutuhom myara. Âjiguetolâ watay, nadaimpa peto onwajm. Arâ lâpylâ Jesus tâinwânse mawylimo âzeholy mâsenagazedylimo wâgâ. Jesus mâinwândyly olâ âdyem ini kuru, ouru takaze, adainrim keba mawânâ ise. Jesus Cristo odopâduo, âyanmo Deus aguely ise: “Tâdâsenagazedylibe lelâlâ wâne, arâlâ olâ Jesus mâinwânsezedylymo. Âdyren-honze âmaemo warâ, âwâkurumo, on-honrumo warâ xuduze urâ” keze mawânkâ âyanmo.

<sup>8</sup>Jesus mâinwynedylymo, âdykâ mâempyramolâ. Tâinwânse âmaemo mâkâ, iwerâ mâempyramolâ. Toenzepa omarumo, âmaemoem anhe-tyby wâgâ; âdara myguehomo nudupa lâgâlâ. <sup>9</sup>Mohomaendylimo, Deus imakelymo awylygue, Jesus mâinwân- tomobyry wâgâ warâ.

<sup>10</sup>Saguhoem Deus itaumbyry egatuwâni modo koendâ kehoem myakâwândy awârâ tâdâsemaguely wâgâ tiuntudyze awylymo. Cristo âewyly iraylâ, mâkâ kieinwântuo kydâsemaguely awyly wâgâ adâkezemo myakâwâm, ânguy adâkeho awyly koendâ nutubamo olâ myakâwâm. <sup>11</sup>Waunroenlâ, xutunrimo Deus Ispirityry eyanmo aguwânmy: “Messias, Deus ingonokyly, âsenagazeze. Âsenagazedylimo olâ âdyren-honze” kewânmy. Messias ezedy olâ myakâ-

wândy aguepa. Awylygue aunlolâ aguelymo: “Ânguyka ise Messias, Deus Ingonokyly? Aunlolâ âdaraka ise saindyly?” kezesylymo. <sup>12</sup>“Messias wâgâ amyguelymo, âigueduomo olâ ise awârâ aidyly. Wayam ise awârâ aidyly, âweonmo ume” kely myakâwândy Deus eyanmo. Iwerâ unâ iwâkuru tâdâsemagueho mâindadylymo, Jesus einwândyly wâgâ aguwânimo modo nhegatyby. Xirâ unâ âyanmo egatuwânibyry modo Deus Ispirityryam aguehoymbyem aguelymo. Awârâ tâdâsemagueho wâgâ mawânkâ anju domodo toenzepa tiuntudyze awylymo wâne, nutubamo olâ ise.

#### **Deus amânhedysemo ato aiedyly kâjimowâdaundâ**

<sup>13</sup>Ohondybyem lelâ itaungâ, Deus amânhedysemo ato inepa amânhetomoem. Inanaynmolâ itaungâ. Aunlolâ mâenmakelymo iwânwântaungâ, Jesus Cristo odopâduo, “Koendonro xuduze urâ” Deus kehobyry. <sup>14</sup>Deus amânhedysemo ato aiedyly kâjimowâdaundâ. Jesus mâinwândylymo iray, ize ato araba kulâ ani izewenkumo, inakai modo aiedyly kulâ ize matomo, âdy mâkâ ize ato awyly mâuntuba mawylimogue. Iwerâ olâ, xurâem mawylimogue, ize matomobyry, izewenrymobyry warâ araba aitaungâ. <sup>15</sup>Deus mawânkâ âgâsenimo, xurâem mitomoem; awylygue mâkâ ara lâpylâ aitaungâ. Âdaunloenlâ inakai akâiedaundâ, inakai aniempyry ato ara. <sup>16</sup>Iwenibyem mawânâ Deus itaumbyry awo wâgâ: “Âdy inakai akâiedaundâ, inakai agânhepyry wato ara” kewândymy Deus.

<sup>17</sup>Deus agâ amygueduomo, “Kunwym Deus” myguelymo. Xypyry etay, mâkâ enado ise idânâ kydâtâdyguyly, xirâ onro anaym aguienyly

modo xutuhuem. Agueduo, ioze lelâ ise aguely, anhedily warâ, kienwântobyry ara, kienwâmpyra kydatobyry ara warâ. Tâinwânnipyry modo koendâ ise nhedyly; tâinwântânrybyry modo olâ ise koendâpa nhedyly. Awylygue onro anaym mawylimo ara aunolâ Deus xyrentaungâ. <sup>18</sup>Âadamudomo ezewenry amânhedilymogue kulâ ani saguhoem Deus xurâem mawylimo, inanajimo. Âdyem nipyra olâ mârâ tâezewenry, awylygue mârâ aguiendylyguepa Deus xurâem kidyly.

Âdygue imakehomoem epywado-byry tutuzelâ âmaemo. Dinherugue, ourugue, pratague warâ inkâba imakehomoem epywadyly; adainrim modo kulâ awârâ. <sup>19</sup>Cristo kruz wâgâ tunu tyapâze igueduo, tâwâense kehoem akâwâm imakehomo nhanâdyly. Kaneru tywykenry kehoem inakanhe adâjitobyry xygakehoem tyâzeim, myara akâwâm Cristo iguely, inakanhe aguitobyry xygakeze, âdaunloenlâ âdy inakai aniempyra awyly umelâ.

<sup>20</sup>Idânârâ âtugudyly iraylâ, Deusram aguehoymbyem awyly kâmakerin-em. Iwerâ xirâ “Xypyry etay” keho ume Deus Jesus ingondyly xarâ onro anaxi, koendâ kyese. <sup>21</sup>Cristo wâgâ tâwâlâ Deus mâinwândyly, xurâem midyly warâ. Igueypyem awyly ume, kurâem ietomâ, pymâ ton-honreinhe, tywâkureinhe warâ ienehonwâm. Deus awârâ anhedily, kienwântoem, “Aiese urâ” kehobyry anhedily kinwânwântoem warâ.

<sup>22</sup>Unâ âkealonro tâinwânse mawylimogue, inakanhe amitomobyry xygakely, igokeyby ara âmaemo. Awylygue ton-honre lelâlâ Cristo eynynâ âpemugumo mâinwinedylymo. Toenzepa iwynedaungâmo lakuru; amyguelymo kulâ waypa nidâ. <sup>23</sup>Iweloem ietybyem

âmaemo, iazeontybyem. Odomo iguedânrygue iazeypyem mawylimo Deus iguedânry aguehobyry âdykâ adaindânry wâgâ. Deus inwenien-hoymby aunloenlâ ise âdyem awyly. <sup>24</sup>Saguhoem Deus, Isaías inwenihoem aguehobyry ara kehoem kagâ aidyly:

“Egâ wâneam nady poji anano modo.

Tywâkure lelâlâ wâne sawanku, aunloenlâ nipyra olâ.

Inepa kehoem nady iladyly; sawanku onro onwa ihuguely warâ.

Arâ lâpylâ idânârâ kurâ domodo xirâ onro anaym iguein-em awylymo.

Idânârâ eon-honrumo adainze, imâsedoem awylymo warâ.

<sup>25</sup>Kywymâry Deus aguehobyry olâ ise âdaunloenlâ nadaimpa; alâ ise aisezedily aguehobyry aralâ”

warâ Deus itaumbry awo wâgâ iwenibyem awyly.

Jesus wâgâ unâ koendonro âyanmo egatuybylâ xirâ Deus itaumbry.

### Idânârâ tynynonro modo agâlâ Jesus

**2** <sup>1</sup>Inakai aiedyly imowâdaungâ. Ânguy kâzenokudaundâ. Inakanhe aini âmaemo watay, koendonro ara tâiseba itaungâ. Tâsewânizeba itaungâ. Agonromo kâdunâguedaundâ. <sup>2</sup>Egâ wâneam iamudo iwelo iazepy. Tyze inwanry tienydyze lelâ. Tadakuilygue ago idyly. Arâ lâpylâ Deus itaumbry iozeno xutuzezedaungâ. Deus Ispiritury unâ nhuduypylâ mawânâ kydâsemagueho wâgâ kiuntuho. Mâindadylymogue, mâinwândylymogue warâ mawânâ

iwâgâ imâem mâuntulymo, kâenmakebynra “Xuduze urâ” kehobyry mâuntulymo warâ. <sup>3</sup>Iwenibyem mawânâ Deus itaumbry awo wâgâ: “Kwymâry tâinwânse mawylmogue, tutuze âmaemo, koendâ kagâ awly.”

<sup>4</sup>Tuhugue âtâ itâdily watay, itâni tuduakeze; izepa tato pylâ nhamuinly-ro. Mârâ tuhu samuimby ara lâpylâ toenzepa Jesus imeni modope awly. Deus olâ “Jesuslâ Messias kâingontyby; tywyneim awâkâ urâem” tâkeze. Igueypyem inkâba Kwymâry Jesus; tâlâ mâkâ. Eyam iwaguepa aintaungâ, tuhu tywyneim kehoem emyenroam. <sup>5</sup>Âtâ saunâtoem tuhu angatoam iedyly myara lâpylâ Deus on-hoam âedylymo, Ispiritury etyem mitomoem. Kurâ domodo eynynâ Deus agâ agueim lâpylâ âmaemo. Deus Ispiritury aguehobyry aralâ, Deus tuomaenze, eagâ adâkeze warâ âmaemo, Deusram ânguylâ mâundulymo waunlo ara. Amyguego tydase Deus, Jesus Cristo iguehobyry wâgâ. <sup>6</sup>Warâ myakâwândy Jesus Cristo wâgâ Isaiás inwenily:

“Âtâ itâni tuhu imâsedo iaxi  
 tyese, ipery nihugueba  
 itoem myara,  
 mâkâ kâinwynegyly  
 kâingonodyly.  
 Siãodâ<sup>a</sup> ise mâkâ, eydâ watodâ.  
 Idânârâ iwymâryem itoem  
 augue.  
 Auguehobyry modo aiese lelâ urâ.  
 Mâkâ kâingonokyly einwânni  
 nâpybazedaymba ise  
 tinwânwântyby wâgâ’ kely  
 Deus.”

Warâ iwenibyem awly Deus itaumbry awo wâgâ.

<sup>7</sup>Âmaemoem tywyneim lelâ Jesus, tuhu tywyneingue tâzekeim; awlygue mâinwynedylymo. Einwântânry modo olâ, mâkâ izepa. Warâ iwenibyem awly Deus itaumbry awo wâgâ: “Mârâ tuhu âtâ itâni modo izepa atobyry ize tadatoem nidâ” kely iwenibyem Salmosdâ.

<sup>8</sup>Warâ Jesus Cristo wâgâ Isaiás inwenily: “Ihodaigânimo ise xirâ tuhu, ihuguehomoem” kely iwenibybe lâpylâ Deus itaumbry awo wâgâ. Toenzepa wâne Deus itaumbry idani modo neinwâmpyramo olâ. Aituo ise Deus ize ato aralâ âsenagazylymo xypyry etay.

<sup>9</sup>Âmaemo Jesus einwânni modo olâ Deus âduakelymo, xurâem mitomoem. Kurâ domodo eynynâ Pymâ Deus agâ agueim âmaemo. Deus ize ato ara lelâ aini modo âmaemo. Deus tâlâ ato âmaemo. Deus ton-honrugue anhetyby egaturin-em iduakeyby âmaemo. Kopae iam duay adakobâni ara ani âmaemo saguhoem. Deus ingâsedybylâ âmaemo, idânârâ iwâgâ mâuntuhomoem. Awlygue iwerâ, ânwa koendâ kehoem tyajineim oze adakobâni ara âmaemo. <sup>10</sup>Saguhoem Deus xurâempa ani âmaemo; iwerâ olâ xurâem âmaemo. Saguhoem idânârâ kytyendâ Deus awly mâuntuba ani âmaemo; iwerâ olâ kytyendâ awly tutuze âmaemo.

#### Jesus einwântaynrim modo aito

<sup>11</sup>Yataen-ho kâinwynegyly modo, enanâgüewâdaungâ xirâ onro anaym sakani kulâ mawlymo; tarâ tâjikeim keba âmaemo. Awlygue âyanmo kâenkadyly, inakai modo amânhedyse matomo imowâdaungâ. Kuoday tâdâjitogylybe-ro waunlo ara mawânâ; inakanhe aguidyse kydato, Deus ize ato aguienkyly agâ

<sup>a</sup> 2.6 Sião egâ vocabulâriodâ.

âjitoguyly-ro waunlo ara. <sup>12</sup>Koendâ lelâ Jesus einwântânry modo agâ itaungâ. Awylygue, tâwâlâ wâne âunâguedylymo, koendonro modo amânhedylimo tientuo olâ, inakai keba mawylimo, aguezemo. “Koendonro âmâ, Deus” kezemo xypyry etay.

<sup>13</sup>Kywymâry Jesus xurâ mawylimogue, idânârâ pymâ domodo agueho kadakadaundâ. Pymâ kuru César einwântaungâ. <sup>14</sup>Pymâ kuru, pymâdo tâmaryem ingonotyby modo einwântaungâ lâpylâ. Aguehoymyem akaemo inakanhe aini modo nhenagazehon-homoem, koendonro aieni modo wâgâ koendâ aguehomoem warâ. <sup>15</sup>Pymâdo tâinwânse âmaemo, koendonro adyese âmaemo warâ watay, Jesus kâmakerim wâgâ xutudânry modo MYK isemo lelâ, âdy wâgâ inwentâguedomo peba mawânâ ise. Awârâ mawânâ Deus amânhedysemo ato. <sup>16</sup>Etadâdybyem etagueyby ara âmaemo. Awylygue koendonro aietaungâ. “Iweâma tâwâlâ âdylâ inakai agânhedylly, ânguy ienagazedaymba ise” tâkezeba itaungâ. Deus agâlâ âmaemo iwerâ. “Aietaungâ” kehobyry amânhepyra tâiseba itaungâ. <sup>17</sup>Kurâ domodo âwankuem kâietaundâ. Cristo eynynâ âpemugumo iwynedaungâ. Deus xyrentaungâ. Âwankuem kâietaundâ. Pymâ César âwankuem kâietaundâ warâ.

### **Kydâpeâmbyralâ,**

#### **kydâsenagazedylly kyzemaenre**

<sup>18</sup>Tâzetary modo, âwymârymo einwântaungâ. Koendonro âwymârymo atay, koendonro keba atay alelâ, âwankuem kâietaundâmo warâ. <sup>19</sup>Alâ kulâ eagâ iwanomo inagazedylimo-ro watay, tyewiâpazeba itaungâ; alâ emaenwâdaungâ. Âdy agâmo aini tutuze Deus; mâkâlâ ise koendâ âenimo.

<sup>20</sup>Aguehobyry mankaduomolâ âwymârymoam mâzenagazeolimo watay, âkealâ inagazehonlomo, aguely mankaduomolâ. Âdaituoba kulâ eagâ iwanomoram mâzenagazeolimo watay olâ Deuslâ ise koendâ nhenimo. <sup>21</sup>Âdakykebalâ Deus kydâsenagazedylly kienmaendyze awyly. Aitoem lakuru mawânkâ Deus kygâsedylly, “Aiekâ” kehobyry aguintoem.

Cristo kruz wâgâ âsenagazedobyry enanâguedaungâ, Deus agâpa kydâiehoba kitoem akâwâm mâkâ aieholy. Tâsenagazeze lelâlâ wâne, âpeânze kepa olâ akâwâm. Kydâsenagazedylly ume, kyewiâpabyra kitoem kienanâguelylâ awârâ. <sup>22</sup>Inakanhe aityby mâkeba mâkâ, âdykâ ânguy nenokubyra lâgâlâ warâ. <sup>23</sup>Tâjywykeoduo, koendâ lelâ aguely, ânguy niwykeba. Kruz wâgâ tâsenagazeduo, “Inagazezemo lâpylâ urâ ayetomobyry wâgâ” kepa akâwâm. Warâ akâwâm aguely: “Deus emaxilâ kâtuly” kely. Tutuze Jesus, Deus koendonro, iozeno lelâ warâ awyly, tânagazeni modo âdanhedylly tutuze warâ.

<sup>24</sup>Kruz wâgâ akâwâm Cristo iguely, tâwâlâ âtuly, inakanhe aguitobyry xygakehoem. Iguely akâwâm, inakai modo aguiempyra kitoem, Deus aguiendyse ato lelâ aguintoem warâ. Jesus sapioguhobyry wâgâ kua ietybyem kydawyly; Jesus Cristo âzenagazeohobyry wâgâ ani Deus agâ koendâ kydâieholy. <sup>25</sup>Kaneru ânwa oze xuzatyby ara ani âmaemo. Kaneru eni emyenro pylâ Jesus Cristo-ro. Xurâempa ani âmaemo saguhoem, iwerâ olâ xurâem midâmo; nhetâmo mâkâ aunlolâ.

### **Ohogüimby modo xuruto**

**3** <sup>1-2</sup>Tâjywydy modo, osomo einwântaungâ. Deus aguehobyry neinwâmpyramo lelâlâ wâne, amidylimo koendâ awyly tientuolâ

ise tyeinwândyse idylymo, Jesus wâgâ unâ eyanmo amyguezesebyramolâ. <sup>3</sup>Âmaemo pekodo modo, mâpâ-gudâdomo ouru mâzekagâin-homo, itymo tâwâenseim warâ wâgâ inkâba âwâkurumo âzeholy. <sup>4</sup>Amânhekylymo wâgâlâ, amyguehomo wâgâlâ tyewiâseba mawylymo wâgâlâ, tâdâjitoguyly myguepa mawylymo wâgâlâ warâ mawânâ âwâkurumo âzeholy. Xirâ mawânâ ise adaindânry, tâwâlâ wâne aripiem midylymo. Awârâ mawânâ Deus xurâem tâjiwâkuru adaindânry.

<sup>5</sup>Arâ myakâwândy pekodo saguho modo, Deus einwânni. Koendonro adienkylymoguelâ, adâkehomoguelâ warâ tywâkuru nhenhonlymo. Deus “Aiese urâ” kehobyry tynwânwânsemo myakâwândy; tusomo tâinwânsemo warâ. <sup>6</sup>Sara enanâguewâdaungâ. Tuso Abraão tâinwânse myakâwândy, “Ywymâry” tâkeze myakâwândy eyam. “Sara iweom” kehonze âmaemo, eara amânhekylymo, aiese tyanepa âmaemo-ro watay.

<sup>7</sup>Tâjisodo, tutuze âmaemo, âdara Deus âwydylymo mâendysemo awyly. Koendâ kehoem etaungâmo; akaemo takaze awârâ on-honrumo. Tawize kehoem etaungâmo. Agâmolâ ise Jesus einwânni modoram Deus nhuduly koendonro modo nhemake-lymo. Koendâ mâempyra âmaemo-ro watay, Deus âdapyramo ise, eagâ amyguedyse matomo.

**Idânârâ Jesus einwânni  
modo xuruto**

<sup>8</sup>Xypyryem kuru warâ âuru-dysemo wawyly. Âzekiba lelâ mâpaunzedomo nidâ; tuogunreim agâ ohogüendaungâ; tuomareim agâ ohomaendaungâ. Âpyndaungâ. Ityendaungâmo. Agonromo agâ imâsedoem ise tâkezeba itaungâ. <sup>9</sup>Tâpeânzeba

itaungâ. Inakanhe aini xurâem inakanhe adâiseba itaungâ. Tyewiâseba itaungâ, agâmo tyewiâtuneim modo agâ. Kâzenagazedaundero; Deusram ekadaungâ, inagazenimo agâ koendâ itoem, inakanhe aitomobyry, koendonroge mâempywadylymo waunlo ara. Deus ingâsedybylâ âmaemo, idânârâ agâ koendâ mitomoem. Arâ ise “Xuduze urâ” kehobyry mâenmake-lymo. <sup>10</sup>Warâ Salmos wâgâ, Deus itaumbyry iwenibyem awyly:

“Tuomare lelâ ize kydatay,  
ânguy kiunâguebyra  
kine,  
ânguy kienokubyra kine  
warâ.

<sup>11</sup>Inakai aiedyly kyjimonre  
lelâlâ;

koendonro aguyjiene.  
Ânguy agâ kydatuebabyra  
kine.

Aunlolâ kyewiâseni modo  
agâ koendâ lelâ kine,  
iewiâkymo adain-hoem.

<sup>12</sup>Deus ize ato aieni modo  
mawânkâ aunlolâ koendâ  
lelâ âzeholy.

Nhekadybymo âjidaholy lelâ  
warâ;

inakai aieni modo olâ  
nepyra, nhekadybymo  
nidapyra warâ”

warâ iwenibyem awyly Deus itaum-  
byry awo wâgâ.

**Kydâsenagazedily koendonro  
aguiendylygue**

<sup>13</sup>Koendonro lelâ amânhekylymo-ro watay, ânguy âmaemoem inakai aiese ton-honruneba. <sup>14</sup>Aituo, koendonro amânhedilylymo umelâ mâzenaga-zeolylymo watay, Deus koendonroge ipywazemo, omazeânzemo warâ. Awylygue inagazenimo kâdytadaundâ,

tâseanezeba itaungâ warâ. <sup>15</sup>Toenzepa Cristo xyrentaungâ. Amânhetomoem aguehobyry aietaungâ, mâkâ mawânkâ âwymârymo kuru. “Âdaituoka Jesus mâinwândylymo? Âdaituoka, ‘Âigueduomo, Deusram ise mydâlymo’ kely mâinwândylymo?” keim, mâin-hoguhomoem âturudybyem lelâ itaungâ. <sup>16</sup>Koendâ lelâ ihoguwâdaungâ. Idataungâ lelâ aguely; tyewiâse kâjihoguwâdaundâ. Tâwâlâ mâsewendâdomoem akâie-daundâ. Tywykeim peba angahumo oday nidâ. Jesus eynynâbaom modo âunâguenimo koendonro modo lelâ amânhedylimo tientuo, âpybazezemo.

<sup>17</sup>Deuslâ mâsenagazedyzze donromo watay, koendonro amânhedylimo-guelâ mâsenagazedylimo nidâ, inakanhe amidylimo wâgâ inkâba. <sup>18</sup>Tyiguely ume, Cristo âsenagazemâ lâpylâ. Inakanhe aguitobyry xygakeze akâwâm mâkâ iguely. Tokalelâ olâ iguewâm; niguezesebyra. Mâkâ inakanhe aitânry iguely akâwâm inakanhe aini modo xurâem, tâinwânni tunwynram tiantoem. Kruz wâgâ sodoadakâjioly iguehoem; Deus Ispiritury olâ Jesus kurâem ietomâ.

<sup>19</sup>Kurâem tâitondyly iraynâ Jesus idâwânmy iguewâtyby modo egadopyry etadâdobyryam, mâkâlâ Messias einwânnipyry modo emakeim tawly wâgâ agueze. <sup>20</sup>Noé pepi imâsedo nhygadyly ume, toenzepa myakâwândy kurâ domodo inakanhe kulâ aidylimo. Tâinwândylymo tynwânwânsezela myakâwândy Deus. Inepa nenagazenehombamo. Deus neinwâmpyramo olâ myakâwândy. Idânârâ onro xytybyem awly ume, aguipa kulâ myakâwândy âsema-guerim, pepi odaji âxiedyby modo lelâ. Oito lelâ myakâwândy âsema-gueyby: Noé, iwydylâ, azagâ tokalâ

warâ imeom, azagâ tokalâ warâ iweisedo, alâ kulâ.

<sup>21</sup>Pepi imâsedo oday tawlygue paru inwenly ume, Noé domodo âsemaguehobyry ara iwerâ kydâsemagueho. Arâ lâpylâ Jesus Cristo mâinwântuomo mâsemaguelymo. Batiza mâieholymo ani, Jesus einwânnipyryem mawlymo mâenehon-homoem, âwykumo etyhoem inkâba. “Tâwentâgueba urâ, Deus xurâem, inakanhe wito-byry xygakehobyry wâgâ” tâkeze ani âmaemo, batiza mâieholymo ume. Deus eon-honrugue Jesus kurâem itobyry wâgâlâ âsema-gueybyem mawlymo. Awlygue tâwâlâ paikayba mâjikaguemo, Jesus wâgâ iweloem ietondybyem mawly mâenehon-homoem. <sup>22</sup>Kayam Deus eydâ atoram todopâze akâwâm mâkâ. Iwerâ Deus eapay eahoru eynynâ eadybyem awly, pymâem, idânârâ anju domodo, ton-honruneim modo warâ iwymâryem.

#### Iweloem ietondybyem

**4** <sup>1</sup>Kruz wâgâ tâsenagazeze akâwâm Cristo iguely. Âdara aguydâieholo kiuntuholâ mâkâ. Xurâem mawlymogue mâzenagazeolymo-ro watay, ohondybyem lelâ itaungâ âsenagazeze mâinwânkylymo mâinmopa mitomoem. Cristo xurâ kydawylygue kydâzenagazeoly kienmaenly watay, inakai modo aiedyly imoimbyryem kydawyly tânehonze, Deus izepa ato kulâ keba aguienkyly awly. Cristo aralâ tywykeba ize kydawyly. <sup>2</sup>Awlygue saguhoem adâjitobyry modo Deus izepa ato âdaunloenlâ akâiedaundâ. Deus ize ato lelâ aietaungâ, âiguehomo saindyly ara.

<sup>3</sup>Saguhoem Jesus mâinwâmpyra mawlymo ume, inakai modo aiedyly mâinmopa mataunaguynre,

Jesus xurâ keba modo adienyde ato. Eagâ mohogüin-homobyry keba kulâ mâynanâguylymo. Âdylâ inakanhe amidyşe matomo adyese lelâ kâinane âmaemo. Okumo ikaji midylymo mâinmopa kâinane âmaemo. Ataen-homo agâ adakuize tâtâdygyuze lâpylâ ani âmaemo âjigüe oku ikaji mitomoem, kywypado modo amânhetomoem. Kywypadoem kehoem kâinane âty mododâ amidylymo, ekudyby modo deus kewâto mâen-hoguedomoem.

<sup>4</sup>Iwerâ olâ arâ amipyra âmaemo. Awylygüe ataen-homo Jesus eynynâbaom âseguâdâdylymo, saguhoem eagâmo amitomobyry ara amidysebamo mawlymogüe. Eagâmo amidyseba mawlymogüe, âynanâdâmo, âwankuem âetâmo warâ. <sup>5</sup>Xypyry etay idânârâ adientyby modo egatuzemo Deus enado iguewâtyby modo, iguedânry modo aelâ. Xirâ anaym aguitobyry ara ise Deus kâpywadyly. <sup>6</sup>Saguhobyry modo ipa, iguewâtybyem. Tunârybyry nheinwântomobyry arâlâ Deusram âzepywaolyimo, arâ lâpylâ ise Deus kâpywadyly. Unâ tâdâsemagueho koendonro egatuwâm olâ, tâinwânni modo Deus eydâ atoram idâhomoem, tygueduomo, nadaimpa itomoem, Deus nadaimpa ato ara.

**Deus konomery nhudyppy  
ara lelâ agüine**

<sup>7</sup>Iwaguepa xirâ modo adain-ho. Inanaynmolâ itaungâ. Tâwâlâ âjimanâdaungâ, Deus ize ato ara amitomoem, Deus agâ amygüehomoem warâ. <sup>8</sup>Koendonro kuru mâpyne-dylymo. Agonromo agâ tâpyneze kehoem âmaemo watay, mâkâ inakanhe aito enanânehonze âmaemo. <sup>9</sup>Âxigodo âwantaungâ; xykyho xuduwâtaungâ warâ. Xurâmoem

amânhekylymo wâgâ tylahureba itaungâ. <sup>10</sup>Âikâ, âikâ warâ Deus konomeryem nhudyppy. Awylygüe mâkâ, mâkâ warâ emawyadâdaungâ inomerymo Deus nhudyppygüe, tywymâry isejiguy xuturim koendâ kehoem isejiguy modo nhewaniho ara. <sup>11</sup>Deus itaumbyry mângatuhoem Deus inomerymo nhuduly-ro watay, Deus amyguedysemo ato lelâ egatuwâdaungâ. Kâmawydâniem Deus inomerymo nhuduly-ro watay, aietaungâ on-honrumo Deus nhudyppygüe. Koendâ lelâ amidylymo tientuomo, Deus ise nhehogueguylymo, Jesus Cristo eynynonro modo koendâ aidylygüe. Aunlolâ tynrenseim, tuomaenzeim, idânârâ iwymâry warâ mawânkâ. Âkealâ xirâ-ro warâ.

**Jesus einwânniem kydawlygüe  
kydâsenagazedo**

<sup>12</sup>Yataen-hodo kâinwynegyly modo, tadahulizeba itaungâ iwerâ mâsenagazedylmogüe. Ouru wâne peto onwanji tâiehoze, iwyku etyhoen-ro, myara lâpylâ agâmo aidyly, Deus ize ato ara mitomoem. Âmaemo kulelâ inkâba âsenagazeni; idânârâ Jesus einwânni modo, Jesus eynynâbaom modoram tâzenagazeozemo. <sup>13</sup>Mâsenagazedylmo ume, tytyremba itaungâ, ohomaendaungâ lelâ. Cristo aiehoobyry ara amâieholymo awylygüe. Odopâday, ehogu, eon-honru warâ ese kurâ. Toenzepa lelâlâ ise mohomaendylmo. <sup>14</sup>Jesus Cristo eynynonroem mawlymogüe âwankuem mâiehoduomo, mâzenagazeoduomo warâ, tuomare lelâ itaungâ, Deus Ispiritury ton-honreim mawânkâ agâmolâ. <sup>15</sup>Âmaemo ewy ânguy nhyân-hombyry wâgâpa, emagadudobyry wâgâpa, âkelomo nhynanâdobyry wâgâpa, âdylâ



inakanhe aitobyry wâgâpa warâ âsenagazeoly nidâ. <sup>16</sup>Cristo xurâem mawylmogoe mâsenagazedylimo watay olâ tâpybazezeba itaungâ. Deusram aguewâtaungâ: “Tuomare xina, ‘Cristo eynynonro’ kelygue tâzekeim tawyllygue” kewâtaungâ.

<sup>17</sup>Tâdâsenagazedo saintybyem mawânâ, kurâ Deus xurâ modolâ waunroem kuru âsenagazeni-ro warâ. Xirâ onro anaym; toenzepa kuru âsenagazeni olâ ise unâ koendonro tâdâsemaguely wâgâ agueim tindadysebaom modo, aunloenlâ âsenagazedoam sameduomo. <sup>18</sup>Arâ mawânâ iwenibyem awyly Deus itaumbyry awo wâgâ: “Ton-honre kehoem lelâlâ koendonro aieni modo âsemaguely. Arâ-ro watay, nuduwâpyra lelâlâ Deus eynynâbaom, ize ato aietânry modo âsemaguehoem” warâ iwenibyem awyly.

<sup>19</sup>Deus ize ato aralâ mâsenagazedylimo watay, emaxi âtuwâdaungâ. Âgunimopyry mawânkâ; adâkeho-byry aiese. Koendonro aiesezedaugâ lelâ, Deus ize ato amânhedylymogoe, mâzenagazeolyumo umelâ.

#### Jesus einwânni modo xuruto

**5** <sup>1</sup>Jesus Cristo einwânni modo iwymârydo kâunrudily iwerâ. Koendâ auguely idataungâ, Cristo einwânni modo iwymâry lâpylâma urâ. Tâense urâ Cristo âsenagazedily. Mâkâ ehogu, eon-honru warâ âzehoday, târâ eagâlâ ise urâ. <sup>2</sup>Âurudilymo, koendâ Deus xurâem ityby modo mâentomoem. Ovelha eni koendâ tâguy nheto ara, akaemo eniem Deus induakeyby âmaemo. Amânhedyse mawylmogoe lelâlâ awârâ aietaungâ, Deus ize ato ara, “Aiekâ” mygueduomo kulâ inkâba. Mâzepywaohomoem kulâ inkâba aietaungâ, Jesus einwânni

modo mâenmawyadâdize mawylmogoe lelâlâ. <sup>3</sup>Amygueduomobyry lelâ tâinwânseim ize matomo waypa lâpylâ nidâ. Amitomoguelâ, âdara aidilymo awyly xutuen-honwâdaungâ, enehonwâdaungâ warâ. <sup>4</sup>Kâeni kuru Kywymâry Cristo odopâduo, aunlolâ ise mâzehogueolyumo. Tâmakezeim iwâkuru, ehozelu adaindânry waunlo emakeze âmaemo.

<sup>5</sup>Alâpylâ salokuzenomo modo, âwynsaundo modo warâ kâunrudily. Agaityom modo einwântaungâ. Idânârâ âyanmo xirâ kâinwenily: Koendâ lelâ agonromo emawyadâdaungâ. Arâ mawânâ iwenibyem awyly Deus itaumbyry awo wâgâ: “Sawo modo eynynâ inkâba Deus, sawo keba modo agâ olâ koendâ” warâ iwenibyem awyly. <sup>6</sup>Deus ton-honreim awyly enanâ-guewâdaungâ. Mâsenagazedylimo emaeuwâdaungâ. Epagudo odaji ituo epagunâze mâkâ. Imakezemo, ihoguezemo-ro warâ. <sup>7</sup>Ikuâdânimo emaxilâ idânârâ xuduwâtaungâ. Aunlolâ mawânkâ mâkâ nhedylymo.

<sup>8</sup>Inanaynmolâ itaungâ, ohondybyem lelâ warâ. Awârâenlâ mawânkâ kuduery Diabu tumunreim. Leão wâne tygâse kehoem todunhuinly tyântoem myara mawânkâ kânâmidily. Jesus kienwâmpyra kyedyse mawânkâ. <sup>9</sup>Ozohondâdybyem lelâ itaungâ, Diabu, Jesus mâinwâmpyra ânehonzemo keduo. Jesus lelâ einwântaungâ. Âmaemo kulelâba âsenagazeni awyly tutuzelâ âmaemo. Tâinkâ lelâba Jesus einwânni modo âsenagazedylimo lâpylâ.

<sup>10</sup>Aunloenlâ nipyra olâ ise mâsenagazedo. Inepa ise mâsenagazedylimo adainly. Koendonro lelâlâ Deus, kytyeni warâ. On-honwanâzemo, aini modo mâenmaen-homoem. Se ondaxi kehoem epadâdyby wayam, wayam warâ nâzekâniwâbyra, arâ ise



(1 Pedro 5.8)

mâkâ mâinwâmpyra mipyra ânehon-lymo, koendâ mâinwânsezedomoem lakuru. Koendâ âesimo mâkâ; ize tato ara ânehonzemo. Aunloenlâ eagâ mitomoem âgâsedâmo, Cristo agâ ity-byem mawylmogue. Mâkâ agâlâ ise. Mâzehogueolymo, mâdyren-honlymo, mojiomaeonlymo warâ. <sup>11</sup>Âdaunloenlâ nadainwâpyra ise mâkâ eon-honru. Aunlolâ ise arâ awyly. Arâlâ nidâ.

#### Kata xypygueândo

<sup>12</sup>Xirâ kata imeimbyry âyanmo kâinweniday, iemawyadâni olâ Silas. Toenzepa kâinwynegyuly merâ, Cristo eynynâ ypemugu. Aunlolâ Jesus einwânni merâ. Omazeânzemo xirâ kata kâinwenily. Kagâ koendâ, kityendâ warâ Deus awyly auguedyse wato. Awylygue mâuntudyzemo wawyly,

Deus koendâ kehoem nhetâmo awyly. Mâinwâmpyra tâiseba itaungâ.

<sup>13</sup>Babilônia donro Jesus einwânni modo, âyanmo tywynu nhawânehonlymo, akaemo, aramo Deus-am iduakewâdyby modo. Marcos lâpylâ âyanmo tywynu nhawânehonly; yataen-ho merâ, ymery ara kâinwynegyuly. <sup>14</sup>Âwaparymodâ tohonuguze âsedaenguwâdaungâ, Cristo eynynâ âjipemugu mawylymo mânehon-homoem<sup>b</sup>.

#### Deus nhesemo

Alâ Deusram kâenkadyly, âmaemo Cristo eynynonro modo madahuliba mitomoem, kâmaynoem mawylumo umelâ, nhetâmolâ awyly mâuntuly-mogue warâ.

Pedro

<sup>b</sup> 5.14 Saguhoem tohonuguze âsedaengulymo. Iwerâma tâpymogoynze tâdâsedaenguly.